

ZAKON

O PREUZIMANJU DIONIČARSKIH DRUŠTAVA

Na osnovu člana 23 Statuta Brčko distrikta Bosne i Hercegovine, Skupština Brčko distrikta Bosne i Hercegovine, na 19. sjednici održanoj 31. oktobra 2005. godine, usvaja

ZAKON

O PREUZIMANJU DIONIČARSKIH DRUŠTAVA

I. OPĆE ODREDBE

Član 1

Zakonom o preuzimanju dioničarskih društava uređuju se:

- uslovi za davanje ponude za preuzimanje dioničarskih društava kao emitenata dionica;
- postupak preuzimanja;
- prava i obaveze učesnika u postupku preuzimanja;
- nadzor nad sprovođenjem postupka preuzimanja dioničarskih društava.

Pojmovi

Član 2

U smislu ovog zakona:

1. emitent je dioničarsko društvo koje je osnovano ili emituje dionice putem javne ponude u smislu Zakona o papirima od vrijednosti Brčko distrikta Bosne i Hercegovine, kao i dioničarsko društvo nastalo u postupku svojinske transformacije u smislu Zakona o privatizaciji preduzeća u Brčko distriktu Bosne i Hercegovine;
2. ponuda za preuzimanje emitenta je javna ponuda za kupovinu svih dionica emitenta s pravom glasa, uz uslove i na način određen ovim zakonom;
3. stjecatelj je fizičko ili pravno lice koje stječe ili je steklo dionice emitenta koje daju pravo glasa;
4. ponudilac je fizičko ili pravno lice koje je u skladu s odredbama ovog zakona obavezno da objavi ponudu za preuzimanje ili namjerava da izvrši preuzimanje iako to nije obavezno u skladu sa odredbama ovog zakona;
5. dionice s pravom glasa su sve dionice emitenta koje daju pravo glasa, nezavisno od toga da li je to pravo nečim ograničeno;
6. dionice su stečene upisom prijenosa dionica na račun stjecatelja u Centralni registar papira od vrijednosti;
7. registar je Centralni registar papira od vrijednosti kod koga se deponuju dionice;
8. Komisija je Komisija za papire od vrijednosti Brčko distrikta Bosne i Hercegovine.

Član 3

Opća načela ovog zakona su:

1. dioničari emitenta na koje se odnosi ponuda za preuzimanje imaju ravnopravan položaj u postupku preuzimanja;

2. dioničari emitenta na koje se odnosi ponuda za preuzimanje moraju imati dovoljno vremena i informacija, kako bi mogli odlučiti o ponudi za preuzimanje;
3. uprava emitenta je dužna u toku sprovođenja postupka preuzimanja postupati u najboljem interesu emitenta;
4. ponudilac i emitent su dužni sprovesti postupak preuzimanja što brže, a emitent ne smije duže vrijeme od predviđenog biti ograničen u svom poslovanju;
5. prilikom trgovanja papirima od vrijednosti ponudioca, emitenta i drugih društava koja učestvuju u ponudi za preuzimanje, ne smije doći do poremećaja na tržištu.

II. OBAVEZA OBJAVLJIVANJA PONUDE ZA PREUZIMANJE

Član 4

- (1) Lice koje stekne akcije emitenta kojima, zajedno s dionicama koje već ima, prelazi 1/3 od ukupnog broja glasova koje daju dionice emitenta s pravom glasa, obavezno je o stjecanju bez odlaganja obavijestiti emitenta, Komisiju i javnost, te objaviti ponudu za preuzimanje, pod uslovima i na način određen ovim zakonom.
- (2) Lice koje je na osnovu ponude za preuzimanje steklo manje od 2/3 dionica s pravom glasa, u slučaju daljeg stjecanja dionica istog emitenta obavezno je objaviti ponudu za preuzimanje.
- (3) Emitent je u roku od tri dana od dana prijema obavještenja iz stava 1 ovog člana obavezan obavijestiti Komisiju o prijemu i sadržaju obavještenja.
- (4) Obavještenje iz stava 1 ovog člana i člana 5 stava 2 ovog zakona mora sadržavati podatke iz člana 12 stava 1 tački 1, 2 i 3 ovog zakona, te izjavu ponudioca da će u zakonom propisanom roku objaviti ponudu za preuzimanje. Obavještenje se objavljuje na način iz člana 18 stava 1 ovog zakona.
- (5) Obaveza obavještanja iz stavova 1 i 3 ovog člana na odgovarajući način se primjenjuje uvijek kad za ponudioca nastane obaveza objavljivanja ponude za preuzimanje.
- (6) Lice koje je po osnovu ugovora o kupovini državnog kapitala, u smislu Zakona o privatizaciji preduzeća u Brčko distriktu BiH, steklo nove dionice u postupku povećanja kapitala emitenta – prilikom svakog daljeg stjecanja dionica istog emitenta dužno je objaviti ponudu za preuzimanje.

Član 5

- (1) Lice koje nije obavezno objaviti ponudu za preuzimanje u skladu s odredbama ovog zakona, a namjerava izvršiti preuzimanje, ponudu za preuzimanje može objaviti samo pod uslovima i na način određen ovim zakonom.
- (2) U slučaju iz stava 1 ovog člana, ponudilac je obavezan o namjeri objavljivanja ponude za preuzimanje obavijestiti emitenta, Komisiju i javnost.
- (3) Obavještanje javnosti o namjeri iz stava 2 ovog člana, za ponudioca nastaje obaveza objavljivanja ponude za preuzimanje pod uslovima i na način utvrđen ovim zakonom.

Član 6

- (1) Nije dozvoljena ponuda ili opća ponuda upućena dioničarima emitenta radi stjecanja dionica emitenta s pravom glasa, ako nakon takvog stjecanja nastaje obaveza objavljivanja ponude za preuzimanje.

- (2) Nije dozvoljen javni ili drugi poziv upućen dioničarima emitenta na davanje ponude radi stjecanja dionica emitenta s pravom glasa, ako tim stjecanjem nastaje obaveza objavljivanja ponude za preuzimanje.
- (3) Dok ponudilac ne sprovede postupak preuzimanja u skladu s odredbama ovog zakona, njegove dionice i dionice lica koje s njim zajednički djeluju, ne daju pravo glasa.

III. IZUZECI OD OBAVEZE OBJAVLJIVANJA PONUDE ZA PREUZIMANJE

Član 7

- (1) Stjecatelj nije obavezan objaviti ponudu za preuzimanje ako:
 1. stekne dionice emitenta nasljeđivanjem,
 2. stekne dionice emitenta diobom zajedničke imovine bračnih drugova,
 3. stekne dionice emitenta prilikom povećanja osnovnog kapitala ulozima izdavanjem dionica zatvorenom ponudom, a skupština emitenta, prije upisa dionica, odobri da određeni stjecatelj može steći preko 1/3 ukupnog broja dionica s pravom glasa bez obaveze objavljivanja ponude za preuzimanje,
 4. stekne dionice emitenta kao stečajnog dužnika u stečajnom postupku,
 5. stekne dionice emitenta u postupku pripajanja preduzeća,
 6. stekne dionice promjenom oblika organizovanja preduzeća,
 7. se dionice emitenta prenose između pravnih lica koje posredno ili neposredno čine isti dioničari ili se prenose radi restrukturiranja unutar matičnog preduzeća.
- (2) Odobrenje iz stava 1 tačke 3 ovog člana skupština emitenta daje tročetvrtinskom većinom glasova prisutnih na skupštini, ne računajući glasove stjecatelja i lica koje s njim zajednički djeluju.
- (3) Ako lice koje stekne dionice na način iz stava 1 ovog člana, dalje stječe dionice istog emitenta, obavezno je da objavi ponudu za preuzimanje.

IV. ZAJEDNIČKO DJELOVANJE

Član 8

- (1) Fizička i/ili pravna lica djeluju zajednički:
 1. ako su se sporazumjeli da zajednički djeluju u vezi sa stjecanjem dionica emitenta ili u vezi sa ostvarivanjem prava glasa prema emitentu ili
 2. ako jedno od njih drži dionice za račun drugog.
- (2) Pravna lica, odnosno fizička i pravna lica, djeluju zajednički kad jedno od njih direktno ili indirektno kontroliše drugo ili druga pravna lica.
- (3) U smislu stava 2 ovog člana smatra se da fizičko ili pravno lice kontroliše pravno lice ako:
 1. posjeduje direktno ili indirektno 1/3 i više dionica s pravom glasa, odnosno udjela u osnovnom kapitalu pravnog lica,
 2. ima pravo upravljanja poslovnom i finansijskom politikom pravnog lica na osnovu ovlašćenja iz ugovora.
- (4) U smislu ovog zakona zajedničkim djelovanjem smatra se i ako je fizičko lice član upravnih i nadzornih organa pravnog lica, odnosno ako je zaposlen, profesionalno angažovan ili vrši određene dužnosti koje mu omogućavaju pristup informacijama interne prirode.

- (5) Društva djeluju zajednički ako su međusobno povezana u smislu odredaba Zakona o preduzećima.
- (6) Smatra se da fizička lica djeluju zajednički ako su bračni drugovi ili ako su u krvnom srodstvu u pravoj liniji, a u pobočnoj liniji zaključno do prvog stepena.
- (7) Uspostavljanje odnosa zajedničkog djelovanja sporazumom iz stava 1 tačke 1 ovog člana izjednačeno je sa stjecanjem dionica s pravom glasa .
- (8) Glasovima stjecatelja pribrajaju se glasovi lica koja s njim zajednički djeluju.
- (9) Kad obaveza objavljivanja ponude za preuzimanje nastane uspostavljanjem odnosa zajedničkog djelovanja sporazumom iz stava 1 tačke 1 ovog člana ili u slučaju kad jedno od lica koja zajednički djeluju stekne dionice tako da tim stjecanjem nastane obaveza objavljivanja ponude za preuzimanje, svako od tih lica obavezno je objaviti ponudu za preuzimanje pod uslovima i na način određen ovim zakonom, a smatra se da je obavezi objavljivanja ponude za preuzimanje udovoljeno ako ponudu objavi bilo koje od lica koja zajednički djeluju.

V. OBEZBJEĐENJE SREDSTAVA

Član 9

- (1) Prije podnošenja zahtjeva za odobrenje objavljivanja ponude za preuzimanje, ponudilac je obavezan ispuniti jedan od uslova:
 - na poseban račun kod banke izdvojiti novčana sredstva potrebna za plaćanje svih dionica na koje se odnosi ponuda za preuzimanje,
 - s bankom zaključiti ugovor o kreditu za tu namjenu,
 - priložiti neopozivu bankarsku garanciju naplativu na prvi poziv u korist aukcionara koji će deponovati svoje dionice.
- (2) Kada ponudu za preuzimanje objavljuje banka, obezbjeđenje sredstava na način iz stava 1 ovoga člana obavezna je ugovoriti s drugom bankom.
- (3) Rok trajanja bankarske garancije iz stava 1 ovog člana ne može biti kraći od 15 dana od zadnjeg dana roka za plaćanje dionica iz člana 15 stava 8 ovog zakona.
- (4) Po isteku roka važenja ponude za preuzimanje, ponudilac može s posebnog računa podići višak iznad sredstava potrebnih za plaćanje deponovanih dionica tek nakon što Komisija primi izvještaj o preuzimanju.
- (5) O svakoj izmjeni uslova ugovora o posebnom računu, kreditu ili bankarske garancije, ponudilac je obavezan tražiti saglasnost Komisije uz dostavljanje primjerka izmjene ugovora, odnosno garancije.
- (6) Komisija može propisati dodatni obavezni sadržaj koji mora imati ugovor o posebnom računu ili kreditu ili bankarska garancija, te može propisati uslove koje moraju ispunjavati banke koje daju kredite ili garancije, radi obezbjeđenja sredstava iz stava 1 ovog člana.

VI. ZAKLJUČIVANJE UGOVORA O DEPONOVANJU DIONICA

Član 10

- (1) Prije podnošenja zahtjeva za odobrenje objavljivanja ponude za preuzimanje, ponudilac je obavezan s depozitarom zaključiti ugovor o deponovanju dionica radi prihvatanja ponude za preuzimanje.
- (2) Depozitar je obavezan zaključiti ugovor o deponovanju dionica u slučajevima utvrđenim ovim zakonom i drugim propisima.
- (3) Prilikom zaključenja ugovora iz stava 1 ovog člana, ponudilac je obavezan depozitaru dati sve podatke potrebne za pripremu i obavljanje poslova deponovanja dionica, podatke o načinu na koji će ponuda biti objavljena, te druge potrebne podatke propisane pravilima o deponovanju dionica.
- (4) Svaku izmjenu ponude za preuzimanje ponudilac je obavezan bez odlaganja dostaviti depozitaru.

VII. OBAVEZE UPRAVE EMITENTA

Član 11

- (1) Nakon što stjecatelj obavijesti emitenta o stjecanju dionica zbog kojeg je obavezan objaviti ponudu za preuzimanje ili o namjeri objavljivanja ponude za preuzimanje, uprava emitenta do okončanja ponude za preuzimanje ne može:
 - 1) koristiti statutom, odnosno odlukom skupštine dato ovlaštenje da izdavanjem novih dionica poveća osnovni kapital emitenta, sve do isteka roka važenja ponude za preuzimanje i roka plaćanja, odnosno, sve do isteka roka za objavljivanja ponude za preuzimanje ako ona nije objavljena;
 - 2) donijeti odluku o preduzimanju vanrednih poslova koji bi značajno promijenili stanje imovine ili obaveze društva;
 - 3) bez odobrenja skupštine, odlučiti da društvo stekne ili otuđi sopstvene dionice.
- (2) U slučaju iz stava 1 ovog člana, uprava emitenta dužna je upoznati radnike emitenta s ponudom za preuzimanje.

VIII. OBAVEZNI SADRŽAJ I USLOVI PONUDE ZA PREUZIMANJE

Član 12

- (1) Ponuda za preuzimanje sadrži:
 - 1) firmu, sjedište i poslovnu adresu emitenta,
 - 2) firmu, sjedište i poslovnu adresu, odnosno ime i prezime i adresu ponudioca i lica s kojima ponudilac zajednički djeluje,
 - 3) sve podatke, uključujući broj glasova u apsolutnom i procentualnom iznosu, o svim dionicama emitenta koje pripadaju ponudiocu, uključujući i dionice lica s kojima ponudilac zajednički djeluje,
 - 4) jasnu izjavu da se ponuda daje svim dioničarima emitenta koji su vlasnici dionica s pravom glasa, te da se ponudilac obavezuje da kupi svaku dionicu s pravom glasa, pod propisanim i objavljenim uslovima,
 - 5) cijenu koju se ponudilac obavezuje platiti po dionici,
 - 6) rok i način plaćanja,

- 7) firmu, sjedište i poslovnu adresu depozitara,
 - 8) rok važenja ponude,
 - 9) detaljna uputstva o načinu i posljedicama deponovanja dionica, te drugim pravima i obavezama dioničara koji deponuju dionice, a posebno o pravu dioničara da povlačenjem deponovanih dionica odustane od prihvatanja ponude za preuzimanje,
 - 10) naznaku ciljeva ponudioca i njegovih namjera u vezi s društvom koje se preuzima u slučaju uspjeha javne ponude,
 - 11) ostale uslove ponude određene ovim zakonom ili drugim propisima Komisije.
- (2) Uz ponudu koju dostavlja Komisiji ponudilac je obavezan priložiti u originalu ili ovjerenoj fotokopiji sljedeće isprave:
- 1) izvod iz sudskog registra, ako je ponudilac pravno lice, odnosno ovjerenu fotokopiju lične karte, ako je ponudilac fizičko lice,
 - 2) isprave o pravnom poslu kojim su stečene dionice emitenta u periodu od jedne godine prije dana objavljivanja ponude za preuzimanje,
 - 3) bankarsku garanciju ili ugovor o kreditu ili ugovor o otvaranju posebnog računa i dokaz o uplati sredstava za plaćanje dionica,
 - 4) ugovor s depozitarom o obavljanju poslova deponovanja dionica,
 - 5) prethodnu saglasnost agencije za bankarstvo entiteta u kojem se nalazi sjedište banke, ako su predmet preuzimanja dionice banke,
 - 6) prethodnu saglasnost ministarstva za finansije entiteta u kojem se nalazi sjedište osiguravajućeg društva, ako su predmet preuzimanja dionice osiguravajućih društava,
 - 7) prethodnu saglasnost nadležne institucije, u ostalim slučajevima kada je to propisano,
 - 8) ukoliko je ponudilac pravno ili fizičko lice sa sjedištem odnosno prebivalištem ili trajnim boravištem u inostranstvu:
 - izjavu kojom imenuje opunomoćenika (firma, sjedište, poslovna adresa odnosno ime i prezime, adresa) za dostavu pismena u Bosni i Hercegovini, s tim da opunomoćenik može biti advokat ili pravno lice ovlašćeno za poslovanje s papirima od vrijednosti,
 - izvod iz sudskog registra ili drugog odgovarajućeg registra iz kojeg je vidljiv organizacioni oblik, sjedište, poslovna adresa, popis lica ovlašćenih za zastupanje, ne stariji od 30 dana od dana dostavljanja zahtjeva za izdavanje prethodne saglasnosti, koji je ovlašćeni sudski tumač preveo na jedan od službenih jezika Brčko distrikta Bosne i Hercegovine.

Član 13

- (1) Ponudilac je obavezan da u roku od 30 dana od dana nastanka obaveze objavljivanja ponude za preuzimanje podnese Komisiji zahtjev za odobrenje objavljivanja ponude za preuzimanje, ponudu i isprave iz člana 12 ovog zakona.
- (2) Komisija će o zahtjevu ponudioca iz stava 1 ovog člana donijeti rješenje u roku od 30 dana od dana prijema urednog zahtjeva.
- (3) Ukoliko uz zahtjev za odobrenje ponude za preuzimanje nije podnesena uredna ili potpuna dokumentacija iz člana 12 ovog zakona, Komisija će odmah ponudiocu dostaviti pismeni zaključak o nedostacima koje je ponudilac obavezan da otkloni najkasnije u roku od 15 dana od dana prijema zaključka.
- (4) Ako Komisija ne donese rješenje o zahtjevu za objavljivanje ponude za preuzimanje u roku iz stava 2 ovog člana, a da u istom roku ne dostavi ponudiocu zaključak o otklanjanju nedostataka, zahtjev se smatra odobrenim.

- (5) Ponudilac može Komisiji podnijeti zahtjev za odobrenje objavljivanja izmjene ponude za preuzimanje najkasnije deset dana prije isteka roka trajanja ponude. Komisija će o zahtjevu ponudioca za odobrenje objavljivanja izmjene ponude za preuzimanje donijeti rješenje u roku od pet dana od dana prijema urednog zahtjeva.
- (6) Ako Komisija ne donese rješenje o zahtjevu za objavljivanje izmjene ponude za preuzimanje u roku iz stava 5 ovog člana, zahtjev se smatra odobrenim.
- (7) Komisija ne odgovara za tačnost i istinitost podataka navedenih u ponudi za preuzimanje.

Član 14

- (1) Ponudilac ne može uslovljavati svoju ponudu za kupovinu dionica na koje se odnosi ponuda za preuzimanje.
- (2) Izuzetno od odredbe stava 1 ovog člana, ponudilac može u ponudi navesti da neće kupiti dionice:
 - na kojima je zasnovan teret (založno pravo, pravo plodouživanja, zabrana raspolaganja i dr.),
 - koje će biti deponovane radi prihvatanja ponude za preuzimanje ako ukupan broj glasova koji daju deponovane dionice, zajedno s ukupnim brojem glasova s kojima ponudilac već raspolaže, ne prelazi 50% glasova od ukupno emitovanih dionica s pravom glasa. U tom slučaju, ako ne bude deponovano dovoljno dionica, ponudilac ne mora kupiti i preuzeti deponovane dionice.

Član 15

- (1) Rok važenja ponude iznosi 30 dana od dana objavljivanja. U slučaju objavljivanja konkurentskih ponuda za preuzimanje, ponudilac može produžiti taj rok sve do isteka roka važenja konkurentskih ponuda.
- (2) U slučaju objave izmjene ponude za preuzimanje, rok važenja ponude se produžava za deset dana. S tim da ukupni rok važenja ponude ne može biti duži od 60 dana, osim u slučaju produženja roka zbog objavljivanja konkurentskih ponuda.
- (3) Ponuđena cijena ne može biti niža od najviše cijene po kojoj je ponudilac ili lice koje s njime zajednički djeluje stekao dionice s pravom glasa u periodu od jedne godine prije dana objavljivanja ponude za preuzimanje.
- (4) Ako je ponuđena cijena iz prethodnog stava ovog člana niža od prosječne cijene ostvarene na berzi ili drugom uređenom javnom tržištu, ponudilac mora ponuditi najmanje prosječnu cijenu ostvarenu na berzi ili drugom uređenom javnom tržištu.
- (5) Ako ponudilac ili lice s kojim zajednički djeluje nije u periodu od jedne godine prije dana objavljivanja ponude stekao dionice emitenta koje su predmet ponude, cijena u ponudi ne smije biti niža od prosječne cijene ostvarene na berzi ili drugom uređenom javnom tržištu.
- (6) Ponuđena cijena dionica iz ponude za preuzimanje u članu 4 stavu 6 ne može biti niža od prosječne cijene ostvarene na berzi ili drugom uređenom tržištu u posljednja tri mjeseca ili niža od nominalne vrijednosti dionice, ukoliko istim nije ostvaren promet na berzi ili drugom uređenom tržištu.
- (7) Prosječna cijena dionica na berzi ili drugom uređenom tržištu izračunava se kao ponderisana aritmetička sredina zaključnih cijena u zadnja tri mjeseca, prije nastanka obaveze objavljivanja ponude za preuzimanje.
- (8) Rok plaćanja određuje se u danima računajući od dana isteka važenja ponude i ne može biti duži od 14 dana od zadnjeg dana ponude. Ponudilac ne smije plaćati dionice prije isteka roka važenja ponude.

- (9) Ponudilac ne može snižavati ponuđenu cijenu niti mijenjati ponudom određen način i rok plaćanja, ali može povećavati ponuđenu cijenu. Za svaku akciju iste klase ponudilac mora platiti istu cijenu.
- (10) Ako ponudilac povećava ponuđenu cijenu, mora obezbijediti sredstva za podmirenje u skladu sa odredbama člana 9 ovog zakona.
- (11) Dioničar prihvata ponudu tako da do isteka roka važenja ponude dionice koje su predmet ponude za preuzimanje deponuje kod depozitara.
- (12) Do isteka važenja ponude ili ako ponudilac ne plati dionice u roku za plaćanje, te u slučaju podnošenja konkurentne ponude za preuzimanje, dioničar može povući deponovane dionice. Povlačenje deponovanih dionica smatra se odustajanjem od prihvatanja ponude, odnosno, raskidom ugovora.
- (13) Dioničar ne može raspolagati dionicama koje je deponovao radi prihvatanja ponude.

IX. KONKURENTSKA PONUDA ZA PREUZIMANJE

Član 16

- (1) Konkurentna ponuda za preuzimanje je ponuda koju, u skladu sa odredbama ovog zakona, može podnijeti svako pravno ili fizičko lice.
- (2) Konkurentna ponuda za preuzimanje može se dati samo nakon objavljivanja i u periodu trajanja ponude za preuzimanje.

Član 17

Nakon što ponudilac objavi ponudu za preuzimanje, trećim licima nije dozvoljeno u sredstvima javnog informisanja ili u elektronskim medijima dostupnim javnosti objavljivati namjeru sticanja ili otuđivanja dionica emitenta, već su ta lica dužna objaviti konkurentnu ponudu za preuzimanje u skladu sa odredbama ovog zakona.

X. OBJAVLJIVANJE PONUDE

Član 18

- (1) Ponudu za preuzimanje i svaku izmjenu ponude ponudilac je obavezan objaviti u «Službenom glasniku Bosne i Hercegovine», «Službenom glasniku Brčko distrikta Bosne i Hercegovine» i u najmanje jednom od dnevnih listova koji izlaze u svakom od entiteta Bosne i Hercegovine, u roku od sedam dana od dana prijema rješenja iz člana 13 st. 2 i 4 ovog zakona ili isteka roka iz člana 13 st. 3 i 5 ovog zakona.
- (2) Smatra se da je ponudilac ispunio obavezu objavljivanja u roku ako su prije isteka roka svi oglašivači prihvatili narudžbe za objavljivanje u prvom sljedećem izdanju. Dokaz o prihvatanju narudžbe ponudilac je obavezan bez odlaganja dostaviti Komisiji.
- (3) Ponudu za preuzimanje i svaku izmjenu ponude ponudilac je obavezan dostaviti emitentu, berzi ili drugom uređenom javnom tržištu na kojem se trguje akcijama emitenta, najkasnije istog dana kad oglašivačima daje narudžbe za objavljivanje.
- (4) Rok važenja ponude računa se od zadnjeg objavljivanja.
- (5) Valjana je i ponuda objavljena nakon isteka roka za objavljivanje.

- (6) Dioničaru koji to zahtijeva, emitent je obavezan dati sve informacije kojima raspolaže u vezi sa ponudom za preuzimanje. Isto vrijedi i za sve izmjene ponude.

Član 19

- (1) Objavljenu ponudu za preuzimanje ponudilac može povući u slučaju:
- 1) konkurentne ponude za preuzimanje po višoj cijeni,
 - 2) stečaj emitenta.
- (2) Povlačenje ponude za preuzimanje ponudilac mora objaviti na način propisan za objavljivanje ponude za preuzimanje.

XI. DEPONOVANJE DIONICA

Član 20

- (1) Deponovanje dionica vrši se preknjižavanjem sa računa vlasnika na poseban račun otvoren za potrebe deponovanja dionica radi prihvatanja ponude za preuzimanje s kojega se vraćaju na račun vlasnika u slučaju povlačenja deponovanih dionica.
- (2) Dionice iz prethodnog stava ovog člana dioničar deponuje tako da, putem pravnog lica ovlaštenog za poslovanje s papirima od vrijednosti, depozitaru predaje ili dostavlja pisani nalog za prihvatanje/otkazivanje ponude za preuzimanje, koji osim podataka o ponudi za preuzimanje, dioničaru i deponovanim dionicama sadrži i dioničarevo ovlaštenje depozitaru da u ime i za račun dioničara uputi garantu pisani poziv za plaćanje na osnovu bankarske garancije, te potpis dioničara.

Član 21

Dioničar se ne može odreći prava na povlačenje deponovanih dionica. Ponudilac se ne može pozivati na dioničarevu izjavu o odricanju od prava na povlačenje deponovanih dionica.

Član 22

O svakom deponovanju i povlačenju deponovanih dionica, depozitar je obavezan bez odlaganja obavijestiti emitenta.

XII. PRIJENOS DIONICA NA OSNOVU PONUDE ZA PREUZIMANJE

Član 23

- (1) Ako je dioničar deponovao dionice u skladu s uslovima iz ponude za preuzimanje, prihvatanje ponude za preuzimanje i obaveza ponudioca da plati cijenu za deponovane dionice nastaje istekom roka važenja ponude za preuzimanje, osim u slučajevima iz člana 14 stava 2 i člana 19 ovog zakona.
- (2) Ponudilac ne može preuzeti deponovane dionice, odnosno, one ne mogu biti prenesene na ponudioca prije isteka roka važenja ponude i dok ne budu plaćene, što uređuje depozitar.

Član 24

Komisija može propisati pravila kojima će bliže urediti deponovanje, plaćanje i preuzimanje deponovanih dionica.

XIII. IZVJEŠTAJ O PREUZIMANJU

Član 25

- (1) Nakon isteka roka važenja ponude za preuzimanje i nakon isteka roka za plaćanje, ponudilac je obavezan u roku od sedam dana objaviti izvještaj o preuzimanju na način propisan ovim zakonom za objavljivanje ponude za preuzimanje i dostaviti ga Komisiji, emitentu, berzi i drugom uređenom javnom tržištu na kojem se trguje dionicama emitenta.
- (2) Izvještaj o preuzimanju sadrži podatke o ponudiocu i emitentu, kada je i kako objavljena ponuda za preuzimanje i njene izmjene, koliko je deponovanih dionica ponudilac isplatio i preuzeo, za koliko dionica su sporne činjenice deponovanja, povlačenja deponovanih dionica, te sa koliko dionica s pravom glasa emitenta ponudilac ukupno raspolaže nakon preuzimanja deponovanih dionica, uključujući i dionice s pravom glasa koje pripadaju licima koja s ponudiocem zajednički djeluje.
- (3) Ako je ponuda uslovljena u skladu s odredbom člana 14 stava 2 ovog zakona i ako u ponudi ne bude deponovano dovoljno dionica, depozitar je obavezan odmah o tome, kao i o ukupnom broju deponovanih dionica, obavijestiti svakog dioničara koji je deponovao dionice, Komisiju, emitenta i ponudioca.
- (4) U roku od sedam dana od dana prijema obavještenja iz stava 3 ovog člana, ponudilac je obavezan objaviti to obavještenje, na način iz člana 18 stava 1 ovog zakona.

XIV. TROŠKOVI

Član 26

Ponudilac snosi troškove deponovanja dionica, plaća cijenu dionica, snosi sve troškove prijenosa dionica, kao i sve ostale troškove koji proizilaze iz ponude, bez obzira na rezultate preuzimanja.

XV. ZABRANA STJECANJA I OTUĐIVANJA DIONICA S PRAVOM GLASA

Član 27

- (1) Od trenutka nastanka obaveze objavljivanja ponude za preuzimanje do objavljivanja ponude, odnosno od objavljivanja ponude do isteka roka važenja ponude, dionice s pravom glasa koje su predmet ponude ponudilac ne smije steći niti se smije obavezati da će ih steći na drugi način osim ponudom za preuzimanje.
- (2) Od trenutka nastanka obaveze objavljivanja ponude za preuzimanje do objavljivanja ponude, odnosno od objavljivanja ponude do isteka roka važenja ponude, ponudilac ne smije otuđivati niti se obavezivati da će otuđiti dionice koje daju pravo glasa u skupštini emitenta.
- (3) Odredbe prethodnih stavova ovog člana, odnose se na sva lica koja zajednički djeluju.

XVI. IZJAVA UPRAVE

Član 28

- (1) U roku od sedam dana od objavljivanja ponude za preuzimanje, uprava emitenta obavezna je objaviti svoje obrazloženo mišljenje o ponudi za preuzimanje na isti način na koji je objavljena ponuda za preuzimanje.

- (2) U svom mišljenju, uprava emitenta obavezna je izraziti stav o ponudi za preuzimanje u cijelosti, a posebno u odnosu na cijenu koju se ponudilac obavezuje platiti po dionici, te ciljeve ponudioca i njegove namjere u vezi s društvom koje se preuzima.
- (3) Osim objavljivanja mišljenja iz stava 1 ovog člana, članovi uprave emitenta ne smiju činiti ništa što bi za cilj imalo bilo kakvo uticanje na ponudu za preuzimanje.

XVII. UVID U KNJIGU DIONIČARA

Član 29

Kada je za stjecatelja nastala obaveza objavljivanja ponude za preuzimanje, Centralni registar papira od vrijednosti obavezan je stjecatelju, na njegov zahtjev, omogućiti uvid u podatke koji se odnose na dioničare i dionice emitenta.

XVIII. OVLAŠĆENJA KOMISIJE I SPROVOĐENJE POSTUPKA NADZORA

Član 30

- (1) Emitenti, dioničari emitenta, poslovne banke, pravna lica ovlašćena za poslovanje s papirima od vrijednosti, te ostala pravna i fizička lica dužni su na zahtjev Komisije u postupku sprovođenja nadzora utvrđivanja obaveze na preuzimanje ili zajedničkog djelovanja, te nadzora postupka preuzimanja, Komisiji omogućiti uvid i dostavljati dokumentaciju koju Komisija smatra potrebnom za sprovođenje nadzora.
- (2) Depozitar je obavezan Komisiji, na njen zahtjev, dati na uvid ili dostaviti sve podatke o vlasničkoj poziciji dioničara.
- (3) Dokumentaciju iz st. 1 i 2 ovog člana, koji može poslužiti kao dokaz u prekršajnom postupku, ovlašćena lica Komisije mogu, uz izdavanje potvrde, privremeno oduzeti, ali samo do pokretanja prekršajnog postupka, kada ih predaju organu nadležnom za vođenje postupka.
- (4) Ponudilac ili emitent dužni su u roku i na način koji odredi Komisija, objaviti dodatna izjašnjenja, obavještenja ili ispravke u vezi s ponudom za preuzimanje.
- (5) Kada u postupku preuzimanja Komisija utvrdi nepravilnosti ili nezaklonitosti, rješenjem će naložiti otklanjanje utvrđenih nezaklonitosti i nepravilnosti odrediti rok za njihovo otklanjanje i rok za dostavljanje dokaza o učinjenom.
- (6) Ako ponudilac ne postupi u skladu s rješenjem Komisije iz stava 5 ovog člana, Komisija može rješenjem obustaviti postupak preuzimanja i ponudu za preuzimanje proglasiti nevažećom.
- (7) Ako lice koje je obavezno objaviti ponudu za preuzimanje to ne učini u zakonskom roku, Komisija će postojanje njegove obaveze na objavljivanje ponude za preuzimanje, utvrditi rješenjem koje će dostaviti i emitentu, depozitaru i berzi ili drugom uređenom javnom tržištu na kojem su uvrštene dionice emitenta. O postojanju ove obaveze Komisija će obavijestiti dioničare javnim objavljivanjem rješenja u najmanje jednom od dnevnih listova koji izlaze u svakom od entiteta Bosne i Hercegovine.
- (8) Svaki dioničar emitenta može putem nadležnog suda zahtijevati obavezno zaključenje ugovora o prodaji dionica, pod uslovima pod kojima je morala biti objavljena ponuda za preuzimanje.
- (9) U slučaju da ne postupi po rješenju Komisije iz stava 7 ovog člana, lice koje je obavezno objaviti ponudu za preuzimanje ne može ostvarivati upravljačka prava po osnovu dionica tog emitenta koje ima u svom posjedu.

Član 31

- (1) U sprovođenju ovlašćenja iz člana 30 ovog zakona, Komisija vodi postupak u skladu s odredbama Zakona o upravnom postupku Brčko distrikta Bosne i Hercegovine.
- (2) Akti koje donosi Komisija u sprovođenju ovog zakona su konačni.
- (3) Protiv akata Komisije nezadovoljna strana može pokrenuti upravni spor.

Član 32

Članovi i radnici Komisije ne odgovaraju za štetu koja nastane prilikom obavljanja dužnosti u okviru ovog zakona, osim ako se dokaže da su određenu radnju učinili ili propustili učiniti namjerno.

XIX. PREKRŠAJNE ODREDBE

Član 33

- (1) Novčanom kaznom u iznosu od 500 KM do 1.500 KM kaznit će se za prekršaj fizičko, a pravno lice u iznosu od 5.000 KM do 17.000 KM, ako ne objavi ponudu za preuzimanje kad je to obavezno po ovom zakonu.
- (2) Novčanom kaznom u iznosu od 300 KM do 1.500 KM kaznit će se za prekršaj fizičko lice, a pravno lice u iznosu od 3.000 KM do 5.000 KM ako:
 - 1) bez odlaganja ne obavijesti Komisiju, emitenta i javnost o stjecanju dionica, suprotno odredbama člana 4 ovog zakona,
 - 2) ponudu za preuzimanje objavi suprotno uslovima i načinu koji su određeni ovim zakonom,
 - 3) prije podnošenja zahtjeva za odobrenje objavljivanja ponude za preuzimanje ne obavijesti emitenta, Komisiju i javnost o namjeri objavljivanja ponude za preuzimanje, suprotno članu 5 stavu 2 ovog zakona,
 - 4) dioničarima emitenta uputi ponudu ili opću ponudu radi stjecanja dionica emitenta s pravom glasa, suprotno odredbi člana 6 stava 1 ovog zakona,
 - 5) dioničarima emitenta uputi javni ili drugi poziv na davanje ponude radi stjecanja dionica emitenta s pravom glasa, suprotno odredbi člana 6 stava 2 ovog zakona,
 - 6) ostvari pravo glasa suprotno odredbi člana 6 stava 3 ovog zakona,
 - 7) ne obezbijedi sredstva za plaćanje svih dionica na koje se odnosi ponuda za preuzimanje, suprotno odredbi člana 9. st. 1 i 2 ovog zakona,
 - 8) rok trajanja bankarske garancije ponudilac ugovori suprotno odredbi člana 9 stava 3 ovog zakona,
 - 9) novčanim sredstvima izdvojenim na poseban račun raspolaže suprotno odredbama člana 9 st. 4 i 5 ovog zakona,
 - 10) mijenja uslove ugovora o kreditu, uslove ugovora o posebnom računu ili uslove bankarske garancije za plaćanje dionica za koje je ponudio otkup, suprotno odredbama člana 9 stava 6 ovog zakona,
 - 11) ne zaključi ugovor o obavljanju poslova deponovanja dionica, suprotno odredbi člana 10 st. 1 i 2 ovog zakona,

- 12) bez odlaganja ne dostavi depozitaru izmjenu ponude za preuzimanje, suprotno odredbi člana 10 stava 4 ovog zakona,
- 13) ponudu za preuzimanje, odnosno njenu izmjenu objavi sa sadržajem različitim od teksta koji je Komisija odobrila ili se smatra odobrenim, ili ako ponudu za preuzimanje, odnosno njenu izmjenu objavi bez odobrenja komisije (član 13),
- 14) uslovljava obavezu kupovine dionica na koje se odnosi ponuda za preuzimanje, suprotno odredbama člana 14 ovog zakona,
- 15) cijenu, način ili rok plaćanja u ponudi za preuzimanje odredi ili mijenja suprotno odredbama člana 15 ovog zakona,
- 16) ne obezbijedi sredstva za plaćanje dionica, suprotno odredbi člana 15 stava 9 ovog zakona,
- 17) raspolaže dionicama koje je deponovao radi prihvatanja ponude, suprotno odredbi člana 15 stava 12 ovog zakona,
- 18) objavi namjeru sticanja ili otuđivanja dionica emitenta, suprotno odredbi člana 17 ovog zakona,
- 19) ponudu za preuzimanje ili izmjenu ponude ne objavi na način propisan odredbom člana 18 stava 1 ovog zakona,
- 20) ne dostavi Komisiji dokaz o prihvatanju narudžbe, suprotno odredbi člana 18 stava 2 ovog zakona,
- 21) ponudu za preuzimanje ili izmjenu ponude u propisanom roku ne dostavi emitentu, berzi ili drugom uređenom javnom tržištu na kojem se trguje dionicama emitenta, suprotno odredbi člana 18 stava 3 ovog zakona,
- 22) emitent ne obavijesti svakog dionicara da je objavljena ponuda za preuzimanje ili izmjena ponude ili mu ne da informacije kojima raspolaže, suprotno odredbi člana 18 stava 6 ovog zakona,
- 23) ponudu za preuzimanje povuče ili povlačenje ponude ne objavi na način propisan za objavljivanje ponude, suprotno odredbama člana 19 ovog zakona,
- 24) ne objavi ili Komisiji i emitentu ne dostavi propisani izvještaj ili izvještaj ne sadrži propisane podatke, suprotno odredbi člana 25 st. 1 i 2 ovog zakona,
- 25) ne izmiri propisane troškove ili ne isplati cijenu dionica, suprotno odredbi člana 26 ovog zakona,
- 26) stječe ili se obavezuje na stjecanje dionica suprotno odredbi člana 27 stava 1 ovog zakona,
- 27) prodaje ili se obavezuje na prodaju dionica suprotno odredbi člana 27 stava 2 ovog zakona,
- 28) u svojstvu člana uprave propusti postupiti prema odredbama člana 28 stava 1 ovog zakona,
- 29) u svojstvu člana uprave emitenta postupa suprotno odredbi člana 28 stava 3 ovog zakona,
- 30) ne omogući Komisiji uvid ili u određenom roku ne dostavi dokumentaciju koju Komisija smatra potrebnom za sprovođenje nadzora, suprotno odredbi člana 30 stava 1 ovog zakona,
- 31) ne omogući Komisiji uvid ili ne dostavi sve podatke o vlasničkoj poziciji dioničara, suprotno odredbi člana 30 stava 2 ovog zakona,
- 32) ne objavi dodatna izjašnjenja, obavještenja ili ispravke u vezi s ponudom za preuzimanje, suprotno odredbi člana 30 stava 4 ovog zakona,
- 33) ne izvrši rješenje Komisije ili ne dostavi dokaze o otklanjanju utvrđenih nezakonitosti, suprotno odredbi člana 30 stava 5 ovog zakona,

34) ako Komisija utvrdi da podaci iz člana 12 stava 1 nisu tačno navedeni.

Član 34

- (1) Novčanom kaznom u iznosu od 500 KM do 1.500 KM kaznit će se za prekršaj fizičko lice, a pravno lice u iznosu od 5.000 KM do 10.000 KM ako:
- 1) prilikom sklapanja ugovora o deponovanju dionica ne dostavi depozitaru sve podatke potrebne za pripremu i obavljanje poslova deponovanja dionica, podatke o načinu na koji će ponuda biti objavljena, te druge potrebne podatke propisane pravilima o deponovanju akcija, suprotno odredbi člana 10 stava 3 ovog zakona,
 - 2) uprava emitenta postupi suprotno odredbama člana 11 ovog zakona,
 - 3) plaća dionice prije isteka roka važenja ponude, suprotno odredbi člana 15 stava 7 ovog zakona,
 - 4) preuzme ili omogući preuzimanje deponovanih dionica, suprotno odredbi člana 23 stava 2 ovog zakona,
 - 5) ne obavijesti svakog dioničara koji je deponovao dionice, Komisiju, emitenta i ponudioca da nije deponovano dovoljno dionica, suprotno odredbi člana 25 stava 3 ovog zakona,
 - 6) ne objavi obavještenje iz člana 25 stava 3 ovog zakona ili objavi obavještenje koje nema istovjetan sadržaj sa obavještenjem koje je primio, suprotno odredbi člana 25 stava 4 ovog zakona,
 - 7) u svojstvu člana uprave propusti postupiti prema odredbi člana 28 stava 2 ovog zakona,
 - 8) ne omogući uvid u podatke, suprotno odredbi člana 29 ovog zakona.

Član 35

- (1) Novčanom kaznom u iznosu od 100 KM do 1.500 KM kaznit će se za prekršaj fizičko lice, a pravno lice u iznosu od 1.000 KM do 5.000 KM ako:
- 1) u roku od 3 dana ne obavijesti Komisiju o prijemu i sadržaju obavještenja iz člana 4 stava 1 ovog zakona, suprotno odredbi člana 4 stava 3 ovog zakona,
 - 2) obavještenje ne sadrži sve propisane podatke i izjavu ponudioca ili su podaci u obavještenju netačno navedeni ili ako obavještenje ne objavi na način iz člana 18 stava 1 ovog zakona, suprotno odredbi člana 4 stava 4 ovog zakona,
 - 3) ne osigura Komisiji mogućnost samostalnog uvida u stanje posebnog računa, suprotno odredbi člana 9 stava 4 ovog zakona,
 - 4) o izmjeni ugovora o kreditu ili bankarske garancije bez odlaganja ne obavijesti Komisiju ili ako Komisiji ne dostavi primjerak izmjene ugovora odnosno garanciju, suprotno odredbi člana 9 stava 6 ovog zakona,
 - 5) ne obavijesti emitenta o deponovanju i povlačenju deponovanih dionica suprotno odredbi člana 22 ovog zakona.

Član 36

Za prekršaj iz čl. 33, 34 i 35 ovog zakona kaznit će se i odgovorno lice u pravnom licu i to novčanom kaznom od 1.000 do 1.700 KM.

XX. ZASTARJELOST

Član 37

- (1) Prekršajni postupak za prekršaje predviđene ovim zakonom ne može se pokrenuti protekom roka od tri godine od dana kada je prekršaj učinjen.
- (2) Zastarjelost za vođenje postupka nastupa kada od dana kad je prekršaj učinjen protekne pet godina.
- (3) Izrečene kazne ne mogu se izvršiti kada od dana pravosnažnosti rješenja o prekršaju protekne pet godina.

XXI. PRIJELAZNE I ZAVRŠNE ODREDBE

Član 38

Dioničari koji na dan stupanja na snagu ovog zakona raspolažu s više od 1/3 prava glasa od ukupno emitovanih dionica emitenta s pravom glasa, a nisu bili obavezni objaviti ponudu za preuzimanje i koji nakon stupanja na snagu ovog zakona žele steći dionice emitenta s pravom glasa, obavezni su objaviti ponudu za preuzimanje.

Član 39

Ovaj zakon stupa na snagu 8. (osmog) dana od dana objavljivanja u «Službenom glasniku Brčko distrikta Bosne i Hercegovine».

Босна и Херцеговина
БРЧКО ДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКО ДИСТРИКТА

Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA

Broj: 0-02-022-287/05
Brčko, 31. oktobar 2005. godine

PREDSJEDNIK
SKUPŠTINE BRČKO DISTRIKTA BiH

Prof. dr. Milan Tomić